

La chasa da la guerra

Ils 11 da mars spagnol

DA GUIU SOBIELA-CAANITZ

■ **Gist trenta mais, dus onns e mez suenter ils 11 da settember 2001 ha il terrorissem da massa puspè pitgà. Questa giada ha'l fatg passa 200 unfrendas e 1400 blessads. Ils criminals avevan cleramain fatg tut il pussaivel per cuntanscher in dumber maximal d'umans. I han prendì en mira glièud anonima, lavurers ed emploiads che stavan en vischnancas d'aglomeraziun e gievan a lavurar mintga damaun en la chapitala cun la viafier urbana.** Tgi èn lezs criminals? Naziunals radicals bascs u fundamentalists islamics? L'emprim ha il mund dubità. José María Aznar, chau da la regenza, e sia ministra da l'exteriur han fatg tut il pussaivel per render vardavla la tesa basca. Ma per tgi ch'enconuscha in pau il patratg da lezs extremists e quel dals apostels musulmans da la guerra sontga, èsi cler che be quests davos possian concepir e pinar mazzaments talmain sanguinus. Il pievel spagnol para d'avair chapì quai e conuschì las intenziuns mal zuppadas da sia regenza. Questa ha immediat survegnì il quint. Las elecziuns legislativas da dumengia, ils 14 da mars han dà ina ferma maioritad relativa a la gronda partida d'opposiziun che sa ussa fumar ina regenza nova.

Ils terrorists bascs

Igl è cler ch'ìls terrorists bascs n'èn betg be criminals, mabain era siemiaders. L'Euzkadi (pajais basc) da lur siemis na corresponda tuttina betg a quai ch'ìls plis avdants giavischan. Quai che la regenza basca postulescha è da discutir cun Madrid per cuntanscher in'associaziun cun atgna represchentaziun exteriura. Ma gnanc ils naziunalsists ils pli extremists paran da resguardar il pievel spagnol sco lur inimi. Tar attentats da terror prendan els en mira represchentants dal stadi; per regla telefonieschan els ordavant per avisar. Questas constataziuns na vulan tuttina betg als distgargiar. Duvrar la terror è in malfatg, tgi che la dovra è in criminal. Ma ils terrorists bascs vulan indeblir il stadi spagnol; dentant eri evident ch'ins

possia, cun in attentat trais dis avant las elecziuns, be rinforzar ils apostels dil maun dir encunter l'Euzkadi, pia la Partida populara (PP) d'Aznar. Mintga Basc, sco vischin da stadi spagnol, sa che la Spagna è il pajais da la reacziun da stinanza («Ussa pir endretg!») e per exempel in dals paucs che n'han betg litgà ils stivals dal tiran Napoleon. Perquai ston ins excluder che la gruppa terrorista ETA haja commess ils attentats dals 11 da mars. Segir pon singuls Bascs en Spagna avair prestà servetschs da manuals ad auters terrorists, per uschè da dir sco persunal a terra. Ma per tgi?

«Els morts són nostres»

Tut che vegn cler sch'ins suppona che fundamentalists islamists hajan concepi e realisà ils attentats da Madrid. Fundamentalists datti en mintga religiu. Lur visiun dal mund sa basescha sin il dualissem: «Nus essan ils buns, tschels èn ils nauschs». Tenor ils fundamentalists islamists stattan ils nauschs t.a. en quai che l'islam classic numnava per arab «ed daar el harb», pia «la chasa da la guerra», l'intschess nua ch'ins astga far guerra. La Spagna ha fatg part da l'attatga encunter l'Irac, pajais d'islam, e mantegna là truppas d'occupaziun; perquai manejan lezs fundamentalists ch'ins astgia la cumbatter, anzi, ch'in bun musulman duaja far quai. Gia l'attentat da matg 2003 a Casablanca (per arab «Daar el baida») encunter instituziuns spagnolas pudeva valair sco in emprim avis. Ina tala «dschihad» na distingua tuttina betg tranter la schuldada e la populaziun civila; i sa tracta simplamain da spussar l'entir pievel per ch'el sa suttametia. I saja dal rest lubì da sa dumandar sche tscherts bumbardaments da citads tudestgas grondas durant la segunda guerra mundiala n'hajan betg g' la medema finamira. Quella dals terrorists da Madrid fiss dentant cuntanschida, damai che José Luís Rodríguez Zapatero, futur emprim minister, ha annunzià ch'el retiria las truppas spagnolas da l'Irac per zercladur sche la situaziun là na sa mida betg. Il pievel spagnol ha dà la maioritad relativa a lez politicher anc pauc enco-



Duvrar la terror è in malfatg, tgi che la dovra è in criminal.

KEYSTONE

nuschent, chapind che l'arroganza d'Aznar e sia participaziun ad ina violaziun evidenta dal dretg internaziunal avevan manà la Spagna en ina situaziun critica. Il frontispizi da la «NZZ» dals 15 da mars mussa in transparent pendì si da demonstrators avant la sedia da la PP a

Barcelona; il text catalan tuna: «La guerra és vostra, els morts són nostres». Quai di tut. Ussa spetg'ins plain mirveglias tge che la Gronda Bretagna, l'Italia e la Pologna fan; tuttas trais han truppas en l'Irac. Davart ils Stadis Unids vegn ins a savair dapli ils 2 da november.